

Во Вторник Ваий Вечера

Обычное стихословие. На Господи возвах, поставим стихов 6: и поем стихиры подобны господина Иосифа. Глас 2.

Подобен: Егда от Древа:

Всеми прилоги лукаваго, * многострастное мое сердце изнемогшее, * гробу сносится уныния люте, * и яко каменем покрывается нечувствием Спасе: * дровом живоноснаго Твоего Креста, * вся сущия во аде ожививый, * возстави мя, оживи, * яко да страхом Твое славлю Божество.

Богатство сластей тлетворных, * лукаваго действием всегда возлюбих, * суетно веселяся несмысленный: * ума же презрех, яко Лазаря инаго, стеньща, * алчуща Божественных брашен Слове, * пламене будущаго избави мя Твоим благоутробием, * яко да славлю Тя Человеколюбца.

Ина господина Феодора, глас 3.

Подобен: Поставиша:

Днесь издше Лазарь, * и рыдает сего Вифания, * егоже Спасе наш воздвизаеши от мертвых * и предуверяеши другом Твоим, * Воскресения Твоего страшное, * адово умерщвление, * и Адамово оживление: * сего ради поем Тя.

И Миней 3. Слава, и ныне, Богородичен.

Прокимен, псалом 110, глас 4: Начало премудрости страх Господень.

Стих: Исповемся Тебе Господи всем сердцем моим.

Бытия чтение. [Глава 31, ст. 3 – 16.]

Рече Господь ко Иакову: возвратися в землю отца твоего, и в род твой, и буду с тобою. Послав же Иаков, призва Лию и Рахиль на поле, идеже бяху стада. И рече им: вижду аз лице отца вашего, яко несть ко мне, якоже вчера и третияго дне: Бог же отца моего бе со мною. И вы сами весте, яко всею силою моею работах отцу вашему. Отец же ваш обиде мя, и измени мзду мою десяти агнцев: но не даде ему Бог зла сотворити мне. Аще сице речет: пестрыя будет твоя мзда: и родятся вся овцы пестрыя. аще же речет: белыя будет твоя мзда: и родятся вся овцы белыя. И отья Бог вся скоты отца вашего, и даде я мне. И бысть егда зачинаху овцы во чреве приемлюще: и видех очима моима во сне: и се козлы и овны восходяще бяху на овцы и козы, беловатыя и пестрыя, и пепеловидныя пестрыя. И рече ми ангел Божий во сне: Иакове. аз же рех, что есть, И рече: воззри очима твоима, и виждь козлы и овны восходящия на овцы и козы белыя, и пестрыя, и пепеловидныя пестрыя: видех бо, елика тебе Лаван творит. Аз есмь Бог явивыйся тебе на месте Божии, идеже помазал Ми еси тамо столп, и обетовал Ми еси тамо обет: ныне убо востани и изыди от земли сея, и иди в землю рождения твоего, и буду с тобою. И отвецавши Рахиль и Лиа, рекосте ему: еда есть нам еще часть или наследие в дому отца нашего? Не яко ли чуждыя вменихомся ему? продаде бо нас, и снеде снедию сребро наше. Все богатство и слава, юже отья Бог от отца нашего, нам будет и чадом нашим: ныне убо елика тебе рече Бог, твори.

Прокимен, псалом 111, глас 4: Милостив, и щедр, и праведен:

Стих: Блажен муж бояйся Господа.

Притчей чтение. [Глава 21, ст. 3 – 21.]

Сыне, творити праведная, и истинствовати, угодна Богу паче нежели жертв кровь. Велемудрый во укоризне дерзосерд: светило же нечестивых греси. Помышления тщаливаго во изобилии: и всяк нерадивый в лишении. Делаяй сокровища языком лживым, суетная гонит в сети смертныя. Всегубительство на нечестивыя устремляется: не хотят бо творити праведная. К стропотным стропотныя пути посылает Бог: чиста бо и права дела его. Лучше жити во угле непокровенном, нежели в повапленных с неправдою, и в храмине общей. Душа нечестиваго не помилуется ни от единого от человеков. Тщету приемлющу невоздержному, коварнейший будет незлобивый: разумевай же мудрый примет разум. Разумевае праведный сердца нечестивых, и уничтожает нечестивыя в злых. Иже затыкает ушеса своя, еже не послушати немощнаго, и той призовет, и не будет послушай его. Даяние тайно отвращает гнев, щадяй же даров воздвизает ярость крепкую. Веселие праведных творити суд: преподобный же нечист у злодеев. Муж заблуждаяй от пути правды, в сонмищи исполинов почиет. Муж скуден любит веселие, любяй же вино и елей не обогатится. отребие же праведнику беззаконник. Лучше жити в земли пусте, неже жити с женою сварливою, и язычною и гневливою. Сокровище вожделенно почиет во устех мудраго: безумнии же мужи пожирают е. Путь правды и милостыни обрящет живот и славу.

На стиховне самогласен дне, дважды. Глас 1:

В багряницу самодержства боготканную, * и в червленицу нетления одеявшись, * о душе моя, свое достоинство поругала еси, * богатство и наслаждение, * грех сотворивши, и презирающе своего сплеменника, * якоже презре нищаго Лазаря богатый. * Но да не со онем мучена будеши, * обнищай духом, и обнищавшему тебе ради Господеви возопий: * багряницею поругания прежде распятия оболкийся, * и наг на Кресте распныйся мене ради, * Твоего Царствия одеянием, * от студа вечнаго Христе избави мя.

Стих: К Тебе возведох очи мои, живущему на небеси. Се яко очи раб в руку господий своих, яко очи рабыни в руку госпожи своея: * тако очи наши ко Господу Богу нашему, дондеже ущедрит ны.

В багряницу самодержства боготканную, * и в червленицу нетления одеявшись, * о душе моя, свое достоинство поругала еси, * богатство и наслаждение, * грех сотворивши, и презирающе своего сплеменника, * якоже презре нищаго Лазаря богатый. * Но да не со онем мучена будеши, * обнищай духом, и обнищавшему тебе ради Господеви возопий: * багряницею поругания прежде распятия оболкийся, * и наг на Кресте распныйся мене ради, * Твоего Царствия одеянием, * от студа вечнаго Христе избави мя.

Стих 2: Помилуй нас Господи, помилуй нас, яко по многу исполнихомся уничижения: наипаче наполнися душа наша поношения гобзующих, * и уничижения гордых.

Мученичен: **О** добрая купля ваша святии! * Яко крови дасте, и небеса наследовасте: * и временно искусившися, вечно радуетесь. * Воистинну добрая ваша купля: * тленная бо оставльше, нетленная восприясте, * и со ангелы ликующе, * поете непрестанно Троицу Единосущную.

Слава, и ныне, Крестобогородичен:

Подобен: Прехвальнии мученицы:

Меч пройде, о Сыне, Дева глаголаше, * на Древе яко узре Христа висяща, * Мое сердце, и терзает Владыко, * якоже древле Симеон Мне предрече: * но востани, и спрослави безсмертне, * Матерь и Рабу Твою, молюся.

В СРЕДУ ВАИЙ НА УТРЕНИ ТРОИЧНЫ ГЛАСА.

По 1-м стихословии седалны Крестны Осмогласника два, с
Крестобогородичным.

По 2-м же стихословии седален господина Иосифа. Глас 2.

Подобен: Камень гробный:

Яко камнем отягчен многими грехами, * во гробе лежу небрежения Щедре: * от негоже мя возведи, * благоутробне Господи. [Дважды.]

Крестобогородичен.

Подобен: Милосердия:

Честным Крестом Сына Твоего соблюдаеми * Владычице Чистая Богородице, * всякий прилог борителя, * вси удобь отражаем. * Темже Тя по долгу прославляем * яко Матерь Света, * и едину надежду душ наших.

По 3-м стихословии седален, господина Феодора. Глас 3.

Подобен: Красоте девства:

Днесь Лазарь умерый погребается, * и рыдание поют сего сродницы, * якоже провидец и Бог, страсть предрекл еси: * Лазарь успе, учеником провещая, * но ныне иду воскресити егоже создах. * Сего ради Тебе вси вопием: * слава державе крепости Твоя. [Дважды.]

Крестобогородичен:

Неискусобрачная Чистая, и Мати Твоя Христе, * зрящи Тя мертва висяща на Древе, * матерски рыдаючи глаголаше: * что Ти воздаде еврейский беззаконный собор * безблагодатный, многих и великих Твоих даров, * Сыне Мой, наслаждайся? * Пою Твое Божественное низхождение.

Канон в Минее: и трипеснец, господина Иосифа, глас 2.

Песнь 3.

Ирмос: Непоплодствовавший мой ум ...,

Силою Креста Твоего укрепив ум мой, изнемогший прилогми лукавыми, к хотению Твоему направи Господи.

Уныния дреманием, на одре спяща мя сластей воздвигни Господи, и Твоим страstem поклонника покажи.

Просветившися душами, постом чисты усрести пойдем Христа, ко Иерусалиму грядущаго плотию.

Богородичен: Неопалившаяся огнем Божества Чистая, попали моя вещная стремления страстей, яко да верно Чистая славлю Тя.

Иный. Глас 3.

Ирмос: Непоплодная душе и безчадная, * стяжи плод благославный, * веселящихся возопий: * утвердихся Тобою Боже, * несть свят, несть праведен, * паче Тебе Господи.

Днесь Лазарь умерый, не утайся всевидящаго ока Иисусова. Темже сказует сие учеником, вопия: Лазарь друг наш успе, воскресити его иду.

Во Иудею Господи паки ити рек, ученики устрашил еси, но дерзостно вопияше Фома: живот есть, идем, аще убо и умрем, абие оживем.

Троицен: Троице единаосущная, Вседержителю Отче, Сыне собезначальный, с сопрестольным Божественным Духом, едино поклонение, Божество несозданное, Тебе поем вси человецы.

Богородичен: Дево Мати Пречистая, кореню Иессеов, от негоже Христос возсия, живоносный цвет земнородных, Еюже избавихомся тли и смерти, Тя поем вси Чистая.

Слава Тебе Боже наш, слава Тебе.

Радуйся Сионе, ныне грядет Царь твой кроток, якоже пророк возопи, и носит жребя Сего плотски, рукою Своею вся содержащаго: поем державу Его.

Катавасия: Непопная душе и безчадная, * стяжи плод благославный, * веселящийся возопий: * утвердихся Тобою Боже, * несть свят, несть праведен, * паче Тебе Господи.

Песнь 8.

Ирмос: В купине Моисею ...,

Смиренныя моя души тяжкий камень лютаго уныния отвали Христе, и воздвигни мя от гроба нечувствия в славу Твою Слове.

Смерть друга Твоего предсказал еси другом, за милосердие милости, провидче и Боже: егоже имел еси воздвигнути из гроба четверодневна, к Твоему славословию.

Во Иудею паки Христе грядеши, ищущую жизни Тя древо, Древом убити, желая обезсмертвити умерщвленные древа снедию.

Богородичен: В Тебе Дево Чистая, видена быша вся шествия Бога, сохраняша Твою чистоту по рождестве, запечатленну яве во вся веки.

Иный.

Ирмос: Из безначальнаго Отца рожденнаго * прежде век Бога, * и в последняя от Богородицы в плоть облекшаяся, * яко совершенна Человека, и Бога истинна, * пойте, благословите, * и превозносите во вся веки.

Лазарь днесь умерый износится, друг Христов, и рыдают суции с Мариено и Марфою вси: Христос же радостию приходит к нему, показати людем, яко Той есть живот всех.

Яко из горы Елеонския, от высоты милостыней, добродетелей ветвие людие секуще, приидите уготовим к нам мысленно пришествие Христова, поюще, благословяще Его, и превозносяще во вся веки.

Благословим Отца, и Сына, и Святаго Духа, Господа.

Троицен: Триипостасная Единице, Отче, Сыне и Душе Живый, едино Божество, едино Царство, Тя хвалят незаходимаго Света ангельская воинства, и мы земнии поем, благословим, и превозносим во вся веки.

Богородичен: Се вси родове блажим Тя Пречистая, величия Твоя зряще: Ты бо раждаеши преестественно всех Творца Бога суца и Человека. Темже Тя благословим, и превозносим во веки.

Слава Тебе Боже наш, слава Тебе.

Со отроки и мы усрящим Христа Бога, вместо ваий приносяще милостыню, в молитве сердечней, с ветвьми осанна вопиюще: благословите, и превозносите Его во веки.

Хвалим, благословим, покланяемся Господеви:

Катавасия: Из безначальнаго Отца рожденнаго * прежде век Бога, * и в последняя от Богородицы в плоть облекшася, * яко совершенна Человека, и Бога истинна, * пойте, благословите, * и превозносите во вся веки.

Песнь 9.

Ирмос: От земнородных кто ...,

Даниил постом огражден, загради уста зверей: сему ревнующи душе моя, рыкающаго якоже льва змия, и ищущаго брашно сотворити всякую душу, Крестною помощию отжени.

Слове Божий, умерщвленную грехами душу мою, и затворенную во гробе преступления, животодавательным Твоим словом воскресив, принести Тебе ветви добродетелей, победителю смерти, сподоби.

Небо яко престол имеяй, и подножие землю: Бога Отца Слово, на жребяти носимъ, во град входит святыи из уст младенец хвалу красную, яко Царь всех совершити.

Богородичен: В женах Ты едина украсилася еси, о пречудная Чистая! краснейшее Слово родивши, паче всех человек явльшагося краснейша: Того убо моли, скверну очистити, Дево, сердца моего.

Иный.

Ирмос: На Синайстей горе, виде Тя в купине Моисей, * неопально огнь Божества заченшую во чреве: * Даниил же Тя виде гору несекую: * жезл прозябший, * Исаиа взываше, * от корене Давидова.

Надгробныя слезы изливают Лазаревы сестры, зряция сродника днесь под камнем горьким: Христос же мой издалеча сие сказуя, глаголаше апостолом Своим, радуясь вас ради, не бех бо плотию тамо.

Паки грядет к тебе, убийце иудее, Христос, спасительную страсть желая исполнити яко Бог: Егоже искала еси камением убити, се к тебе самозван хотя приходит ко убийству твоему, во еже спасти нас.

Троицен: Божество Единица, и Троица есть: о преславнаго обращения! соединяемая Естеством, делится Лицы, свойственно: несекома бо сечется, едино сущи троится: сия Отец есть, Сын, и Дух Живый, соблюдающая все.

Богородичен: Детородную деву кто слыша, и мать без мужа? Марие совершаеши чудо: но скажи ми, како? Не испытай глубины Богорождения Моего: сие всеистинное, паче человека ума постижение.

Слава Тебе Боже наш, слава Тебе.

От финик ваиа сплетше мысленно, и чувственно сретение Владыце сотворим, грядущему к нам: ибо благословен Грядый во имя Господа же и Отца, яко Сын истинный.

Катавасия: На Синайстей горе, виде Тя в купине Моисей, * неопально огонь Божества заченшую во чреве: * Даниил же Тя виде гору несекому: * жезл прозябший, * Исаиа взываше, * от корене Давидова.

Светилен гласа.

На стиховне стихира самогласна дне, дважды. Глас 1:

Израиль в порфиру и червленицу облачашеся, * одеждми священными и царскими сия: * законом же и пророки богатея, * законными службами веселяшесе: * но Тебе обнищавшаго распен вне врат Благодетелю, * и жива по распятии отменяся, * в недрах Бога Отца присносущнаго, * жаждет капли благодати: * якоже богатый немилостивый от Лазаря убогаго, * иже в порфире и червленице, * в негасимый огонь вшед: * и видя болезнует, перее крупиц истины скудныя люди языческия, * ныне в недрах веры Авраама греющияся, * Твоя крове багряницу с червленицею крещения носящия, * и Твоими обилующия и наслаждающияся даровании, и глаголющия: * Христе Боже наш слава Тебе.

Стих: Исполнихомся заутра милости Твоя Господи, и возрадовахомся, и возвеселихомся: во вся дни наша возвеселихомся, за дни в няже смирил ны еси, лета в няже видехом злая. И призри на рабы Твоя, и на дела Твоя, и настави сыны их.

Израиль в порфиру и червленицу облачашеся, * одеждми священными и царскими сия: * законом же и пророки богатея, * законными службами веселяшесе: * но Тебе обнищавшаго распен вне врат Благодетелю, * и жива по распятии отменяся, * в недрах Бога Отца присносущнаго, * жаждет капли благодати: * якоже богатый немилостивый от Лазаря убогаго, * иже в порфире и червленице, * в негасимый огонь вшед: * и видя болезнует, перее крупиц истины скудныя люди языческия, * ныне в недрах веры Авраама греющияся, * Твоя крове багряницу с червленицею крещения носящия, * и Твоими обилующия и наслаждающияся даровании, и глаголющия: * Христе Боже наш слава Тебе.

Таже стих: И буди светлость Господа Бога нашего на нас, и дела рук наших исправи на нас, и дело рук наших исправи.:

Мученичен: Вас прехвальнии мученицы, * ни скорбь, ни теснота, ни глад, ни гонение ниже раны, * ни ярость зверей, ни меч, ниже огонь претяй, * разлучити от Бога возмогоша: * любовию же паче к Нему, * яко в чуждих подвижшесе телесех естество забысте, смерть презревше. * Темже и по достоянию болезней ваших мзду приясте, * Небеснаго Царствия наследницы бысте, * молитесь о душах наших.

Слава, и ныне, Крестобогородичен.

Подобен: Всехвальнии мученицы:

Видящи висима Христе, * чисто Рождшая Тя, * повесившаго на водах землю Человеколюбче, взываше: * увы Мне, что странное видение, * како зайде доброта Твоя, * сладчайший Сыне, * безмерная, величаю Твою милость, * яко страждещи волею за всех.

НА 6-М ЧАСЕ

Тропарь Пророчества. Глас 5:

Милости Твоя Господи сотвори с нами, * и не предаждь нас беззаконием нашим, * Святой Владыко Вседержителю, * Тебе молимся.

Прокимен, псалом 112. Глас 4: Хвалите отроцы Господа, хвалите имя Господне.

Стих: Буди имя Господне благословено от ныне и до века.

Пророчества Исаина чтение. [Глава 58, ст. 1 – 11.]

Тако глаголет Господь: возопий крепостию и не пощади: яко трубу возвыси глас твой и возвести людем Моим грехи их и дому Иаковлю беззакония их. Мене день от дне ищут и разумети пути Моя желают, яко людие правду сотворившии и суда Бога своего не оставившии: просят ныне у Мене суда праведна, и приблизитися ко Господу желают, глаголюще: Что яко постихомся, и не увидел еси? смирихом души наша, и не уведел еси? во дни бо пощений ваших обретае воли ваша, и вся подручныя ваша томите. Аще в судех и сварех поститесь, и биете пястми смиреннаго, вскую Мне поститесь якоже днешь, еже услышану быти с воплем гласу вашему? Не сицеваго поста Аз избрах, и дне, еже смирити человеку душу свою, ниже аще слячеша яко серп выю твою, и вретище и пепел постелеша, ниже тако наречете пост приятен. Не таковаго [бо] поста Аз избрах, глаголет Господь: но разрешай всяк союз неправды, разрушай обдолжения насильных писаний, опусти сокрушенныя в свободу, и всякое писание неправедное раздери. Раздробляй алчущим хлеб твой, и нищия безкровныя введи в дом твой: аще видиши нага, одей, и от свойственных племени твоего не презри. Тогда разверзется рано свет твой, и исцеления твоя скоро возсияют: и предыдет пред тобою правда твоя, и слава Божия обымет тя. Тогда воззовещи, и Бог услышит тя, и еще глаголющу ти, речет: се приидох. аще отымещи от себе союз, и рукобиение, и глагол роптания, И даси алчущему хлеб от души твоея, и душу смиренную насытиши: тогда возсияет во тьме свет твой, и тьма твоя будет яко полудне. И будет Бог твой с тобою присно.

Прокимен псалом 113. Глас 6. Благословени вы Господеви сотворшему небо и землю.

Стих: Небо небесе Господеви, землю же даде сыновом человеческим.